

ԴԵՐԵՆԻԿ ԴԵՄԻՐՃՅԱՆ

1956 թվականի դեկտեմբերի 6-ին, երկարատև, ծանր հիվանդությունից հետո վախճանվեց սովետահայ ականավոր արձակագիր, Հայկական ՍՍՌ Գիտությունների ակադեմիայի իսկական անդամ Դերենիկ Կարապետի Դեմիրճյանը:

Դերենիկ Դեմիրճյանի մահով սովետահայ գրականությունը կորցրեց իր խոշորագույն դեմքերից մեկին, արձակի մի այնպիսի վարպետի, որն իր ստեղծագործական ավելի քան վաթսուն տարիների բեղուն գործունեությամբ հայ արձակ և դրամատիկական գրականությունը հարստացրել է բազմաթիվ մեծարժեք երկերով, որոնք հավետ կապրեն հայ ժողովրդի հետ, որպես նրա հոգևոր կուլտուրայի կլասիկ նմուշները:

Դերենիկ Դեմիրճյանը ծնվել է 1877 թվականին Ախալքալակում: Նախնական կրթությունն ստացել է գավառական քաղաքի հայկական ծխական դպրոցում: Դեռևս դպրոցը շավարտած, ծնողների հետ տեղափոխվում է Արտահան, որտեղ նա շարունակում է իր նախնական կրթությունը: 1892 թվականին Դեմիրճյանը գալիս է Էջմիածին՝ Գևորգյան ճե-



մարանում շարունակելու ուսումը: Այստեղ է, որ նա առաջին անգամ մոտիկից հաղորդակից է դառնում ռուսական և արևմտաեվրոպական առաջավոր գրականությանը, տարվում է Պուշկինի, Լերմոնտովի, Գոգոլի, Տոլստոյի, Գյոթեի, Հայնեի և Շեքսպիրի երկերով:

Նույն այդ թվականներից Դեմիրճյանը փորձում է գրել բանաստեղծություններ, որոնք տպագրվում են Տ. Նազարյանի «Տարազ»-ում, ասլա «Մուրճ» ամսագրում:

1895 թվականին Գևորգյան ճեմարանում բռնկած աշակերտական խռովությունների սլատճառով Դեմիրճյանը թողնում է ճեմարանը, գնում Թիֆլիս, ուսումը շարունակում Ներսիսյան դպրոցում, որն ավարտում է 1897 թվականին: Այդ ժամանակվանից էլ սկսում է նրա՝ զրկանքներով ու տնտեսական դժվարություններով լի երիտասարդական կյանքը: Դեմիրճյանը աշխատում է

տարբեր բնագավառներում, ծառայում տարբեր հաստատություններում, բայց միշտ հետևում գրականության, զբաղվում իր ինքնազարգացմամբ:

1890 թվականին Թիֆլիսում լույս է տեսնում նրա բանաստեղծությունների անդրանիկ ժողովածուն: Նեղ է այդ բանաստեղծությունների ընդգրկման շրջանակը. դրանք արտահայտում են վառ երազներով հասարակական կյանք մտած, բայց հենց առաջին քայլերից հիասթափված պատանու մտորումներն ու որոնումները: Դեմիրճյանը շարունակում է գրել պոեմներ, բանաստեղծություններ, միաժամանակ մտածելով բարձրագույն կրթություն ստանալու մասին: 1905 թվականին նրան հաջողվում է մեկնել Շվեյցարիա և հետևել ժնևի համալսարանի մանկավարժության և գրականության ֆակուլտետների դասախոսություններին: Առավել մեծ շափով ընդլայնվում է Դեմիրճյանի մտահորիզոնը, նա կապվում է արևմտաեվրոպական առաջավոր մտքի ներկայացուցիչների հետ և 1903 թվականին ավարտելով համալսարանը, վերադառնում է Կովկաս, միաժամանակ հետևում երաժշտության, ապա 1910 թվականից պաշտոնավարում է Թիֆլիսում որպես Հովնանյան դպրոցի հայոց լեզվի և գրականության դասատու:

1912 թվականին լույս է տեսնում Դեմիրճյանի բանաստեղծությունների երկրորդ ժողովածուն: Այդ թվականներից սկսած՝ Դեմիրճյանը գրում է մի շարք պիեսներ («Վասակ», «Դատաստան», «Ազգային խայտառակություն», «Հովնան մեծատուն» և այլն):

Առաջին համաշխարհային պատերազմի տարիներին Դեմիրճյանը գրում է պատմվածքներ, մեծ տաղանդով պատկերելով պատերազմի արհավիրքները, հայ ժողովրդի գաղթն ու տառապանքները: Այդ պատմվածքներից ուշագրավ են հատկապես «Ավելորդը» և «Ստամբուլը», որոնք մատնում էին արձակի ապագա վարպետին:

Հայաստանում սովետական կարգերի հաստատման առաջին տարիներից Դեմիրճյանը գրում է մի շարք նոր պատմվածքներ («Սաթոն», «Նիգյարը», «Ռաշիդը», «Միայն մեկը», «Բնկերներ» և այլն, կոմեդիաները («Քաջ նազար», «Նապոլեոն Կորկոտյան», «Ֆոսֆորային շող» և այլն) և «Նրկիր հայրենի» դրաման, որոնցում երևում է նրա գաղափարական և ստեղծագործական նկատելի աճը:

Հայրենական Մեծ պատերազմի տարիներին Դեմիրճյանը իր գրիչը ի սպաս դրեց գերմանա-ֆաշիստական զավթիչների դեմ մղված պայքարին, գրելով մի շարք պատմվածքներ («Խոշտանգված ավանդը», «Անխուսափելին» և այլն), որոնցում նա մերկացնում էր ֆաշիստների գազանությունները և ատելություն բորբոքում թշնամու նկատմամբ:

Պատերազմի փոթորկոտ օրերին էր, որ Դերենիկ Դեմիրճյանը գրեց իր ամենանշանավոր և ծավալուն վեպը՝ «Վարդանանք»-ը, որտեղ պատկերված է հայ ժողովրդի ազատագրական պայքարը պարսկական բռնապետության դեմ 5-րդ դարում:

«Վարդանանք»-ը լույս տեսնելու հենց առաջին օրերից դարձավ ընթերցող լայն հասարակության սիրելի դիրքը: Վեպի այդ մեծ հաջողությունը արդյունք էր վարակող ու ջերմ այն հայրենասիրության, որով տողորված է «Վարդանանք»-ը սկզբից մինչև վերջ: «Վարդանանք»-ը, ոչ միայն սովետահայ պատմական վեպի փայլուն հաղթանակն էր, այլև սովետական արձակի ամենահաջողված նմուշներից մեկը:



Չնայած իր խոր ծերությանը, Դերենիկ Դեմիրճյանը «Վարդանանք»-ից անմիջապես հետո ձեռնարկեց ծավալուն մի այլ պատմական վեպի՝ «Մեսրոպ Մաշտոց»-ի ստեղծմանը: Նա շտեպավ իր այս նոր վեպի առանձին հատորով հրատարակությունը, սակայն նոր երկի այն հատվածները, որոնք լույս տեսան «Սովետական գրականություն» ամսագրում, վկայում են, որ Դեմիրճյանը իր ութսունամյակի շեմքին պատմական անցյալը գեղարվեստորեն պատկերել է երիտասարդական ամենավառ երևակայությամբ և հայ գրականությունը հարրստացրել մի նոր, կլասիկ ստեղծագործությամբ:

Դերենիկ Դեմիրճյանը իր ստեղծագործության առաջին տարիներից մինչև կյանքի վերջը անդավաճան ընթացել է մեր ժողովրդի հետ՝ նրա պայքարի բոլոր էտապներում, մեծ վարպետությամբ այդ պայքարը արտացոլելով գեղարվեստական գրականության մեջ: Նա մեծ հետաքրքրություն է հանդես բերել դեպի հայ ժողովրդի պատմության, գրականության, լեզվի և նրա կուլտուրայի այլ բնագավառների հարցերը դիսկուսիաներում, մամուլում և այլ առիթներով հանդես գալով կուռ տրամաբանությամբ՝ օժտված և խորապես ինքնատիպ ելույթներով ու հողվածներով, որոնք մեծ արժեք են ներկայացնում և արժանի են հավաքման ու առանձին հատորներով հրատարակվելու:

Դեմիրճյանը բառի լայն առումով ժողովրդական գրող էր: Նրան գիտեր ու սիրում էր ամբողջ հայ ժողովուրդը:

Սովետական գրականությանը մատուցած ծառայությունների համար, մնայուն այն մեծարժեք ստեղծագործությունների համար, որոնցով նա հարրստացրել է սովետական գրականությունը, Դերենիկ Դեմիրճյանը արժանացել է միութենական կառավարության գնահատմանը և պարգևատրվել է Լենինի ու Ոչխատանքային Կարմիր Դրոշի շքանշաններով:

1953 թվականին Դ. Դեմիրճյանը ընտրվեց Հայկական ՍՍՌ Գիտությունների ակադեմիայի իսկական անդամ: Հակառակ իր առողջական վատ վիճակին և խոր ծերությանը, նա մինչև կյանքի վերջին օրերը մոտիկից հետաքրքրվում էր հայ ժողովրդի կուլտուրայի հետ կապված հարցերով, հեղինակավոր իր կարծիքով նպաստում մի շարք հարցերի լուծմանը:

Դերենիկ Դեմիրճյանի թողած գրական արժեքավոր ժառանգությունը նրա անունը կփոխանցեն սերնդե սերունդ: Նա կապրի հայ ժողովրդի հետ ընդմիշտ, որպես հայ արձակ գրականության խոշորագույն վարպետներից մեկը: